

von Wulf Wager

Erektile Dysharmonie



Also d' Leut werdat emmer o'verschämter. Guad, i ben vor zwoi Wocha Fuchzge worda. Des isch jo net schlemm ond duat au net weh. Mir macht des scho garnix aus. Aber wo i vor a paar Dag en Katalog mit Artikel für "Leben im Alter" en 's Haus gschickt kriagt han, han i me scho g'ärgret. Zeug geit's do, do vrrecksch. S' geit jo wirklich praktische Sacha. Aber über die Pumpe bei erektiler Dysfunktion han i mi scho gwondret. Ja soll mr do sein Schniedel etwa

uffpomma wie a Fahrrädle? Ond vor allem: Worum schickat dia ausgerechnet mir so an Katalog mit so Zeugs drenna? Hallo? I ben Fuchzge ond stand voll in dr Blüte meines Lebens. Schließlich werd i am Samschdig nomol heirata. Was soll i do mit so ra Luftpomp!

I ben no koi Senior, der noch em Motto lebt: "Von Montag bis Freitag mach i nix ond am Wochenende erhol i mi drvo." I stand no voll em Leba ond muass au no schaffa und will als Kontrascht au a Freid am Leba han - ohne Luftpomp.

Sicher - irgendwann werd au i - hoffentlich - älter. No seh i nix meh, hair nix meh, ond vielleicht wer i au des Luftpömple brauche. No kann i den Katalog jo emmr no bschdella.

In Zukunft werd i scho mol uf jeden Fall jeden Dag des Senioragebet sprecha: "Gib mir die Senilität, um die Leute zu vergessen, die ich nicht mag; gib mir das Glück, die zu treffen, die ich mag; und gib mir genug Sehkraft, um den Unterschied zu merken!"

Bis näggschd Woch'

Ihr

Alle Kolumna zom Nochleser
onder: www.woascht.de oder em facebook em Wulf Wager Fanclub